

Aruba Dushi Tera Nos Faronan

*E faro bieo di
Punta Basora.*

Antes →

Bo por imagina bo mes riba un caminda grandi, anto sin borchì di trafico pa spiarta bo cu tin cruzada, lorada of otro peligranan ta cercando? Wel mescos cu esnan riba caminda, esnan riba lama tambe mester di e 'borchinan' di advertencia y e faro (vuurtoren) ta un di nan.

Su luz ta sende-paga of 'flash' pa muestra navegantenan e caminda pa dreña waf òf pa spiarta nan cu tin un seco den lama. E promé faronan tabata torennan chikito riba cual tabata tin bakinan cu ta contené palo of carbon cu nan tabata sende na candela. Nan ta

sospechá cu hende a cumenza usa faro tempo cu barconan a cumenza subi lama miles di añanan pasá.

Awendia tur país cu ta keda na orilla di lama tin un of mas faro. Ora un faro ta wordo construí na tera, e construcción aki ta bai mas facil y ta costa menos cu ora nan ta trahé riba barancanan cu ta wordo sutá pa olanan of riba un seco. Mas parti nan ta trahé di material fuerte manera graniet, concreet bashá cu piedra of di hero bashá cu staal.

Aruba tabata tin 3 faro: esun na Punta Basora (Seroe Colorado), esun na Hudishibana (popularmente jamá California) y Willem III toren cu un tempo tambe tabata fungi como un faro.

E faro original na Punta Basora ya no tey mas, solamente e fundeshi a keda. Despues nan a pone un tubo di 3 pa 4 meter cu luz en vez di e toren. Rond di dje tabata tin hero pa proteccion y un trapi chikito. Durante ultimo añanan nan a renoba e poste di luz aki y rond di e luz nan a instalá un kashi, pero ainda no a bin un toren.

E faro na Hudishibana a wordo construí na año 1910. El a wordo diseñá pa un arquitecto frances y construí pa un americano jamá Cook. Originalmente e faro aki tabata tin un spiel cu ta drey riba hopi bela - 'Rotating Mirror' - y cu ta duna masha claridad. Tempo cu petroleo a bini, nan a usa un lampi di petroleo y mas despues nan a haya


electricidad. E faro di Hudishibana sa wordo jamá erroneamente e 'Faro di California Point'. E punta ey di Aruba jama Hudishibana y e lugar cu ta rondoné ta Cudarebo. E 'duinennan' patras di e golf course jama Santo Grandi.

E nomber California Point a bin tempo cu na año 1891 un barco cu jama "The Californian" a sink aki. Y como cu e ta zona parecido, nan ta jama e punta oost di Aruba 'Colorado Point' y e punta west 'California Point'.

ICH



E faro di Hudishibana.



E faro renobá di Punta Basora.

← **Awor** →



CHABALITO

Number 4 - Año 2 - December, 1999 - Afl. 2,=

